

廣聖義卷





御製

天地定位 陰陽協和 星辰順度 日月昭明  
 寒暑應候 兩陽以時 山嶽靖謐 河海澄清  
 草木蕃廡 魚鼈咸若 家和戶寧 衣食充足  
 禮讓興行 教化修明 風俗敦厚 刑罰不用  
 華夏歸仁 四夷賓服 邦國鞏固 宗社尊安  
 景運隆長 本支萬世 正統十年十一月十一日





道德真經廣聖義序

卷一

序曰珠韜玉札云太上老君降跡行教遠近  
有四其一歷劫稟形隨方演化即千二百號  
百八十名散在諸經可得徵驗矣其二此劫  
開皇之始運道之功孕育乾坤胞胎日月為  
造化之本為天地之根播氣分光生成品彙  
自五太之首逮殷周之前為帝王師代代應  
見即鬱華錄圖廣成尹壽因機表號是也三  
皇迭往五帝不歸雲紀龍師時遷數革鳥官  
火運川逝風移步驟不同澆淳漸變雖揖讓

斯在而干戈屢興阪泉有翦戮之師丹浦有  
專征之旅智詐行而大樸隱仁愛顯而孝慈  
生玄默希夷日以寢薄陶唐以耄昏馱位虞  
舜以歷試登庸憂軫萬方服勤庶政老君號  
尹壽子居于河陽以道德真經降授于舜經  
一  
之旨也道以無為居先德以有稱為次亦猶  
三皇之書言大道也五帝之書言常道也其  
下薄裁非之義節兼愛之仁損俯仰之禮挫  
鈷巧之智斥用兵之暴抑譎詐之謀使人復  
朴還淳以無為無事為理舜雖力而行之竄



凶舉相明目達聰敦睦九族平章百姓而恬  
和清靜之道莫能致也故禹湯之後天下爲  
家各親其親各子其子大道旣隱玄化不流  
禮樂滋繁政刑大用矣其三老君以商陽甲  
之代降神寓胎武丁之年誕生於亳卽今真  
源縣九龍井太清宮是其地也或隱或顯潛  
化羣方當周昭王癸丑之年以此二經授關  
令尹喜傳於天下世得而聞焉其四將化流  
沙與尹喜期會於西蜀青羊之肆示現降生  
卽昭王丁巳之年也此道德經自函關所授



累代尊行哲后明君鴻儒碩學詮疏箋註六

十餘家則有節解上下老君與尹喜解內解上下尹喜

以內修之旨解注想爾二卷三天法師張道陵所注河上公章

句漢文帝時降居陝州嚴君平指歸十四卷

漢成帝時蜀人名遵山陽王弼注字輔嗣魏時南陽何

晏字平叔魏河南郭象字子玄向秀弟穎川

鍾會字士季魏隱士孫登字公和魏文晉僕

射太山羊祐字叔子注沙門羅什本西胡人

玉門關入中國注二卷沙門圖澄後趙時西國胡僧沙

門僧肇晉時人梁隱居陶弘景武帝時人貞



卷 范陽盧裕 後魏國子博士 一 草萊臣劉仁

會 後魏伊州梁縣人注二卷 吳郡徵士顧歡 字景怡南齊博士注四卷

松靈仙人 隱青溪山無名氏年代 晉人河東裴楚恩 注二

卷 秦人京兆杜弼 注二 宋人河南張憑 字長宗明

帝 太常博士注四卷 梁武帝 蕭衍注道德經四卷證以因果為義 梁簡文

帝 蕭綱作道德述義十卷 清河張嗣 注四卷不 梁道士

臧玄靜 字道宗作疏四卷 梁道士孟安排 號大孟作經義二卷

梁道士孟智周 號小孟注五卷 梁道士竇略 注四卷與武帝

羅什所 宗無異 陳道士諸糝 作玄覽六卷 隋道士劉進喜

作疏 六卷 隋道士李椿 注上下二卷 唐太史令傅奕 注二



音義卷并竹唐嵩山道士魏徵作要義五卷法師

宗文明作義泉仙人胡超作義疏十卷道士

安丘作指歸道士尹文操作簡要法師韋錄

字處玄注兼義四卷道士王玄辯作河上公釋諫議大

夫肅明觀主尹愔作新義道士徐邈注四直

翰林道士何思遠作指趣二卷衡嶽道士薛

季昌作金繩十卷洪源先生王鞅注二卷玄

訣二法師趙堅作講疏太子司議郎楊上善

高宗時人作道德吏部侍郎賈至作述義十

卷一集注真言二十卷道士車弼作疏任真子李榮注上下成都



道士黎元興

作注義四卷

太原少尹王光庭

作契源注

二卷道士張惠超

作志疏四卷

龔法師

作集解四卷

通義

郡道士任太玄

注二卷

道士沖虛先生殿中監

申甫

作疏五卷

岷山道士張君相

作集解四卷

道士成

玄英

作講疏六卷

漢州刺史王真

作論兵述義上下二卷

道

士符少明

作道譜策二卷

玄宗皇帝所注道德上下

二卷

講疏六卷

即今所廣疏矣所釋之理諸家不

同或深了重玄不滯空有或溺推因果偏執

三生或引合儒宗或趣歸空寂莫不並探驪

室競掇珠璣俱陟鍾山爭窺珪瓚連城在握



照乘盈懷敷引則光粲縑緗演暢則彩文編  
簡語內修則八瓊玉雪雰霽於丹田九轉琅  
膏晶熒於絳闕盡六氣迴環之妙臻五靈夾  
輔之功忘之於心息之於踵得無所得而了  
達化元矣語品證也則擺落細塵超登上秩

遊八外而放曠指三境而躋昇蹈太一之位  
矣而惣內外之要兼人天之能者未有其倫  
我開元至道昭肅孝皇帝降神龍變接統象  
先戡內難以乘乾咨中興而御極無為在宥  
四十五年汾水襄城靡勞轍迹具茨大隗自



得朋遊廓八溟為仁壽之庭普萬寓為華胥  
之國至道至德超哉明哉欽若尊經本朝家  
教象繫不足以擬議風雅不足以指陳橫亘  
古今獨立宇宙雖諸家染翰未窮衆妙之門  
多士研精莫造重玄之境凝旒多暇屬想有

羔一

四

歸躬注八十一章製疏六卷內則修身之本  
囊括無遺外即理國之方洪纖畢舉宸藻遐  
布奪五雲之華天光煥臨增兩曜之色固可  
以季仲十翼輝映二南若親稟於玄元信躬  
傳於太上冠九流而首出垂萬古而不刊則



大風朱鴈之訶誠難接武典論金樓之作詎  
可同年但以疏註之中引經合義周書魯史  
互有發明四始漆園或申屬類後學披卷多  
普本源輒採撫衆書研尋篇軸隨有比況咸  
得備書纂成廣聖義三十卷大明在上而燭  
火不休巨澤溥天而灌浸不息誠不知量粗  
備闕文天復元年龍集辛酉九月十六日甲  
子序



道德真經廣聖義卷之一

唐廣成先生杜光庭述

叙經大意解疏序引

將釋此經大分二段先明製疏後解正文今  
初述製疏之由者我大唐玄宗皇帝垂衣之

羔一

五

眇鍾想妙門以大道為天地原根老君乃玄  
元聖祖二經敷演綿歷歲年說自舜朝傳於  
周代詮註疏解六十餘家言理國則嚴氏河  
公楊鑣自得述修身則松靈想爾逸軌難追  
其間梁武簡文僧肇羅什臧陶顧孟霞舉於



南朝任黎二張星羅於西蜀其餘祖述互有  
否臧未盡發揮孰窺堂奧以開元十一年躬  
爲註解下詔曰在昔元聖強著玄言

義云詔者勅命之書也在天子爲詔爲誥  
爲勅爲制在皇后太子諸王爲教爲令皆  
君命於臣上命於下之詞也曰者字林云  
曰者從口出言爲曰亦云張口吐舌爲曰  
說文云曰詞也從口乙聲象口出氣有聲  
而成言詞也故云曰昔者往也在者存也  
元者始也聖者靈通之德也書曰睿作聖



是也強者力取也著者述作也玄者深妙也言者詞也謂老君爲道化之宗元弘睿聖之至德闡微妙無名之道爲強名演暢之詞將以恢振玄風化導於代理深義奧故謂玄言居萬聖之先故謂元聖矣

詔曰權輿真宗

義云權輿始也真者純正不雜也宗尊也詔曰啓迪來裔

義云啓開也迪進也通達也來謂將來也裔嗣續也邊也謂此道德二篇垂於萬代

傳範後王廣化人天永敷秘妙也

詔曰遺文誠在精義頗乖

義云遺留也謂老君玄化既畢上登九清  
所著真經遺留於代百王所仰萬古常存  
誠信也信為不刊之典也精者純粹深奧

一

六

也義者經之文理也頗甚也乖爽也謂此  
經玄奧精純之理世所未窮雖百家詮註  
尚甚乖爽謂下句也

詔曰撮其指歸雖蜀嚴而猶病

義云撮者採結之謂也指者趣向也歸者



義理會聚也蜀嚴者仙人嚴君平居於蜀  
肆作道德指歸一十四卷恢廓浩瀚爲時  
所稱蜀都楊子雲昌言於漢朝曰蜀嚴道  
德沈冥言其識量深厚玄德隱微非常俗  
之所知而猶病耳當時以爲道德之說文  
止五千指歸之多將及數萬演之於世謂  
爲富贍廣博議之於理傷於蔓衍繁豐故  
云雖蜀嚴而猶病也

詔曰摘其章句自河公而或略

義云摘者採頡分判也章者截斷音句也

句者言之所絕也自從也河公者河上公也太極葛玄仙公道德經序訣云河上公者莫知其姓名也漢孝文皇帝時結草為菴于河之濱常讀老子道德經即今陝州黃河之側有河上公廟路左有漢文帝望

蒸一

七

仙臺存焉時人不知公之姓名常見織履為業居於河上故號河上公爾或略者聖旨以為道德尊經并包萬法圍制三才理國理家之宗修身修道之要無所不攝無所不周而河上公分為八十一章局於九



九之數有失大聖無為廣大之趣故云自  
河公而或略也

詔曰其餘浸微固不足數

義云其餘者言自蜀嚴河公之外五十餘  
家註義也浸遠也微細也數計也嚴雖猶  
病可以議於重玄河雖或略亦足明其至  
妙自外諸家浸遠微細不足比方固非聖  
旨之所計數也

詔曰則我玄元妙旨豈其將墜

義云我者皇帝自謂也玄元妙旨謂二經

玄妙之旨也。聖旨歎道德隱奧之文上下  
玄妙之趣未有了達解釋之人自蜀嚴河  
公之後注疏者去聖逾遠述道益踈豈可  
墜廢湮絕而不弘暢於代矣。

詔曰朕誠寡薄常感斯文猥承有後之慶恐  
失無爲之理

義云朕我也。古人相謂皆呼人曰卿稱己  
爲朕。莊子云雲將鴻蒙皆自稱朕是也。自  
秦始皇制法以天子一人自稱曰朕其餘  
臣庶不得復僭而稱焉。寡者道未廣也。薄



者德未豐也聖旨自謙之詞也每仰感此  
經恐玄理抑絕不得人皆開悟而我紹聖  
祖之玄廕居萬寓之至尊安可使無為之  
文壅而不流道德之訓晦而不顯也有後  
者謂老君垂裕光啓聖唐是也且夫弓冶

羔一

八

之子尚不失於箕裘折薪之家或慮曠于  
負荷況睿德光於堯禹聖文邁於古先固  
當潤色玄玄之功使炳煥于千古也

詔曰每因清宴輒扣玄關隨意所得遂爲箋  
註豈成一家之說但備遺闕之文

義云聖旨以萬機之暇深入玄關扣寂求  
音探真達妙以契合希微之理聖文釋冲  
寂之文得自神襟諧於祖訓矣箋表也解  
也註釋也尚以謙德不欲同呂氏丘明自  
爲一家之述作但備衆人所註解未了之

義爾

詔曰今茲絕筆是詢于衆公卿臣庶道釋二  
門

義云絕筆者經理既暢製述已周釋筆罷  
書是謂絕筆如昔仲尼自衛反魯因魯史



而修春秋自隱公訖哀公一十二公二百  
四十二年褒貶行事至哀公十四年戊午  
春西狩於大野叔孫氏之車子鉏商獲麟  
以為不祥以賜虞人焉仲尼觀之曰麟也  
然後取之夫麟鳳五靈王之嘉瑞也今麟

卷一

九

出非其時虛其應而失其歸此聖人所以  
為感也絕筆於獲麟之一句者所感而起  
固所以為終也今註經既終乃下明詔將  
以宣行聖作博問羣賢絕筆之義雖同非  
因感歎之事是表聖德謙讓問于王公卿

佐逮於道釋二宗旁求辨博之才更俟發  
明之理也

詔曰有能起予類於卜商鍼疾同於左氏渴  
於納善朕所虛懷苟副斯言必加厚賞

義云卜商字子夏孔子弟子也論語八佾

篇云子夏問於夫子曰巧笑倩兮美目盼

兮素以爲絢兮何謂也子曰繪事後素子

夏曰禮後乎諸家所註云此詩上二句在

衛風碩人之二章閔莊姜之詩也其下一

句逸也比喻莊姜有盼倩之色而能以禮



自持喻如繪畫絺繡先以五彩分布廕映  
成文然後以白色分別其間乃能一一彰  
顯分明也夫絺刺之成文為繡畫之成文  
為繪此夫子喜子夏聞繪事後素之言即  
知以盼倩美色須以禮自持故云禮後乎  
夫子乃曰起予者商也始可與言詩已矣  
蓋喜卜商明了夫子言詩之意故云能起  
發我言詩之旨也左氏者左丘明也夫子  
著春秋丘明傳之經有所誤則丘明正之  
或先經以始事或後經以終義春秋之得

立明若良醫之鍼疾矣聖旨延佇羣才共  
暢玄理若仲尼之於子夏春秋之俟立明  
不拒直言唯在進善以虛懷俟望以厚賞  
訪求明聖情採納之至也賞以勸善亦以  
報功也

詔曰且如諛臣自聖幸非此流

羔一

十

義云諛臣自聖者尚書罔命篇云僕臣諛  
厥后自聖是也賢良在用固無諛佞之臣  
英叡垂乾豈有自聖之失誠非此流也  
詔曰懸市相矜亦云小道既其不諱咸可直



言

義云懸市相矜者昔呂不韋為秦丞相封萬戶侯威望之盛冠於海內聚賓客著書書成懸於市曰有增減一字者賞千金號曰呂氏春秋大誇於時今聖旨註述既成下訪才彥開直言之路垂不諱之恩則懸市矜誇誠為小道矣不韋後得罪始皇竄之於蜀也

詔曰勿為來者所嗤以重朕之不德

義云不德者謂失無為之德也玄經奧旨

演暢既周再垂博採之言乃下獎延之詔  
則九圍之外八極之中孰不仰感聖明朝  
宗至道矣暨明年乃御書四石幢註經立  
於左街興唐觀右街金仙觀又諸州節度  
使刺史各於龍興觀開元觀形勝之所各

羔

十一

立石臺以傳不朽又尋御製此疏宣布寰  
瀛勅曰道德五千實惟家教理國則致乎  
平泰修身則契乎長生包萬法以無倫冠  
六經而首出宜昇道德經居九經之首在  
周易之上以道德周易莊子爲三玄之學



仍以莊子為南華真經文子為通玄真經  
列子為沖虛真經庚桑子為洞靈真經准  
明經例赴舉其老君傳內析出韓非不令  
同傳

上來述製疏之由已竟向下入解正文於  
中大分為二一者先解疏題二者入文科  
判今初也先解疏題曰

老子道德經疏者疏題即經題也向下當辯  
所言疏者疏決開通之義也謂經含衆義玄  
妙幽深雖詮註已終而文義未盡故述此疏

開通幽蹟疏決玄微分釋意義今可會入故  
謂之疏亦云疏者條也條理經義令人易曉  
或云鈔鈔以抄集爲名或云記記以紀錄爲  
目此蓋隨時立名皆是包括義理之義也疏  
釋題訓者釋以銷解爲義言將疏決經文先  
當銷解經目題者訓視之首凡經籍記傳史  
策篇章先標首目視之可會總以此義名之  
曰題即標舉綱領之意也訓者教言也隨文  
訓解之義謂六書不同也大凡文字之興雲  
篆初凝傳於天上倉頡象跡興於人間大體



有六一謂象形日月字是也二謂指事上下  
字是也三謂假借行雖字是也四謂形聲江  
河字是也五謂會意止戈爲武人言爲信反  
正爲之是也六謂轉注考老左右字是也製  
文字六意不同形聲假借轉注等意以成文

兼一

十二

字須以訓之乃明其義理爾雅有釋訓毛詩  
有詁訓即其類也

疏御製者向來已明所作疏文明御製述作  
之聖即謂玄宗皇帝也乃太上老君三十六  
代孫睿宗第三子大唐之第六帝也龍文表

聖日角標竒叶太平之符應壬辰之運母曰  
昭成順聖太后竇氏以則天垂拱元年乙酉  
八月五日戊戌生於東都生而聰明睿哲及  
長寬仁孝友好學善屬文英武果斷尤工楷  
隸兼善騎射三年閏月丁卯封楚王天授二  
年十月戊戌出閣開府置官屬長壽二年封  
臨淄王居於興慶里景龍二年出為潞州別  
駕是時州境日抱戴月重輪逐鹿渡河赤龍  
據按嘉禾合穗黃龍乘城仙洞自開童謠累  
應黃龍再見赤鯉騰波李樹連理神著翹立



寢堂瑞氣壺口紫氣伏龍疑山巨人留迹夏  
禹表氣聖人金橋及神人傳慶凡一十九瑞  
編於史策唐隆元年入誅韋后平內難迎睿  
宗即位至開元元年自相國平王登極在位  
四十四年天寶十四年傳位皇太子寶應元  
年壬寅崩年七十八歲御者臨制之稱如御  
寓御天義也製者作造之謂如制禮作樂之  
言也

上來釋疏題已竟次入正文將釋下文約  
疏大料二段一曰總標宗意二曰開章釋

文總標中又分爲二一者所詮之法即指  
道德二字也二者能詮之教即經之一字  
也解釋具在向下經題中當辨

夫此道德二字者宣道德生畜之源經國理  
身之妙莫不盡此也昔葛玄仙公謂吳王孫  
權曰道德經者乃天地之至妙有天道焉有  
人道焉有神道焉大無不包細無不入宜遵  
之焉就此門中大略宗意有三十八別  
第一教以無爲理國經云絕聖棄智人利百  
倍絕仁棄義人復孝慈絕巧棄利盜賊無



有又云愛人理國能無爲乎又云我無爲  
而人自化

第二教以修道於天下經云修之於天下其  
德乃普又云執古之道以御今之有又云  
執大象天下往

第三教以道理國經云以道莅天下其鬼不  
神非其鬼不神其神不傷人又云天下無  
道戎馬生於郊

第四教以無事法天經云人法地地法天又  
云道常無爲而無不爲侯王若能守萬物

將自化

第五教不以尊高輕天下經云貴以身爲天下若可寄天下愛以身爲天下若可託天下又云柰何萬乘之主而以身輕天下輕則失臣躁則失君又云聖人不爲大故能

羔一

十四

成其大

第六教不尚賢不貴寶經云不尚賢使人不爭不貴難得之貨使人不爲盜又云欲不欲不貴難得之貨

第七教化人以無事無欲經云常使人無知



無欲使夫知者不敢為也為無為則無不理矣又云我無事而人自富我無欲而人自樸又云不欲以靜天下將自正

第八教以等觀庶物不滯功名經云天地不仁以萬物為芻狗聖人不仁以百姓為芻狗又云行不言之教又云為而不恃功成不處

第九教以無執無滯經云為者敗之執者失之又云去甚去奢去泰又云聖人無常心以百姓心為心

第十教以謙下為基經云貴以賤為本高以下為基又云江海所以能為百谷王者以其善下之又云受國之垢是謂社稷主受國不祥是為天下王又云大國宜為下又云善用人為下又云大國以下小國則取

十五

小國

以上皆本  
天子而言

第十一教諸侯以正理國經云以正理國又云以智理國國之賊不以智理國國之福又云民之難理以其智多是以難理

第十二教諸侯政無苛暴經云理大國若烹



小鮮又云朝甚除田甚蕪倉甚虛又云其  
政察察其民缺缺

第十三教諸侯以道佐天子不尚武功經云  
以道佐人主不以兵強天下又云兵強則  
不勝又云善勝敵不爭又云雖有甲兵無  
所陳之使人復結繩而用之又云兵者不  
祥之器不得已而用之又云勝而不美

第十四教諸使守道化人經云古之善為士  
者微妙玄通又云其政悶悶其民淳淳

第十五教諸侯不翫兵黷武經云用兵有言

吾不敢為主而為客不敢進寸而退尺又  
云抗兵相加哀者勝又云禍莫大於輕敵  
又云善為士不武又云攘無臂執無兵又  
云不爭之德

第十六教諸侯不尚淫奢輕徭薄賦以養於

人經云民之飢以其上食稅之多是以飢  
又云人多伎巧竒物滋起

第十七教諸侯權器不可以示人經云魚不  
可脫於泉國有利器不可以示人又云古  
之善為道者非以明民將以愚之



第十八教以理國修身尊行三寶經云我有  
三寶保而持之一曰慈二曰儉三曰不敢  
為天下先

第十九教人修身曲己則全守柔則勝經云  
曲則全又云柔勝剛弱勝強又云柔弱勝

卷一

十六

剛強又云柔弱者生之徒剛強者死之徒  
又云強梁者不得其死

第二十教人理身無為無欲經云常無欲觀  
其妙又云不見可欲使心不亂

第二十一教人理身保道養氣以全其生經

云致虛極守靜篤又云專氣致柔又云為  
腹不為目去彼取此又云知其白守其黑  
又云知其子守其母又云我獨異於人而  
貴求於食母又云綿綿常存用之不勤

第二十二教人理身崇善去惡經云天下皆  
知美之為美斯惡已皆知善之為善斯不  
善已又云常善救人故無棄人常善救物  
故無棄物又云善人不善人之師又云挫  
其銳解其紛又云上善若水

第二十三教人理身積德為本經云含德之



厚又云上德若谷又云大丈夫處其厚不  
處其薄居其實不居其華又云君子終日  
行不離輜重

第二十四教人理身勤志於道經云上士聞  
道勤而行之又云勇於不敢則活善無不

兼一

十七

第二十五教人理身忘棄功名不耽俗學經  
云絕學無憂又云功成名遂身退又云成  
功不居又云為道日損又云名與身孰親  
第二十六教人理身不貪世利經云身與貨  
孰多得與亡孰病又云甚愛必大費多藏

必厚亡又云難得之貨令人行妨

第二十七教人理身外絕浮競不銜已能經  
云不自見故明不自伐故有功不自矜故  
長又云大辯若訥大巧若拙又云廣德若  
不足又云大音希聲又云自知者明自勝

者強

第二十八教人理身不務榮寵經云寵辱若  
驚又云富貴而驕自遺其咎又云持而盈  
之不知其已揣而銳之不可長保  
第二十九教人理身寡知慎言經云知不知



上不知知病又云多言數窮不如守中又  
云輕諾必寡信多易必多難又云塞其兌  
閉其門終身不勤

第三十教出家之人道與俗反經云俗人昭  
昭我獨若昏俗人察察我獨悶悶又云明  
道若昧進道若退

第三十一教人出家養神則不死經云谷神  
不死是謂玄牝又云深根固蒂長生久視  
之道又云善建不拔善抱不脫

第三十二教人體命善壽不亡經云死而不

亡者壽

第三十三教人修身外身而無為經云後其身而身先外其身而身存

第三十四教人理心虛心而會道經云虛其  
心弱其志

燕一

十八

第三十五教人處世和光於物經云和其光  
同其塵又云大道汎兮其可左右又云被  
褐懷玉

第三十六教人理身絕除嗜欲畏慎謙光經  
云五色令人目盲五音令人耳聾五味令



人口爽馳騁畋獵令人心發狂又云民不  
畏威則大威至

第三十七教人哀多益寡經云以有餘奉不  
足又云既以與人已愈有既以與人已愈  
多

第三十八教人體道修身必獲其報經云陸  
行不遇兕虎入軍不被甲兵又云以其無  
死地

舉此三十八別以明經之大意所詮之法然  
則此經大則包羅無外細則入於毫間豈止

三十八門便盡其要爲存教義汎舉大綱比  
之秋毫萬分未得其一也禮記云道也者不  
可須臾離可離非道也若爲君之無道德如  
瞻視之無兩目若爲臣之無道德如胷腹之  
無五藏理家之無道德如尸殭而無氣由是  
論之道之於人不可闕矣其若離言教絕指  
陳玄之又玄妙之又妙斯可以神照不可以  
言傳道之極矣

上來總標已竟向下開章釋文

道德真經廣聖義卷之一





